

Morning Regional Dogri News Bulletin, 14th July 2024

मार्निंग डोगरी न्यूज़ बुलेटिन, समे. 09-20 Hrs

<><><><><><>

Headlines

1. प्रधानमंत्री नरेन्द्र मोदी होरें आखेआ जे हाल दे बरें च 8 करोड़ रोजगार पैदा कीते गे न, जेहदे कन्ने बेरोजगारी बारे दुष्प्रचार करने आलें गी करारा जवाब थोआ ऐ।
2. केन्द्र सरकार नै जम्मू कश्मीर दे उपराज्यपाल दियां शक्तियां बधाई दित्तियां न। सरकारै आखेआ ऐ जे इस गेड़ दा मकसद केन्द्र शासत प्रदेश च सुचारू प्रशासन जकीनी बनाना ऐ।
3. केन्द्री मंत्री डॉ. जितेन्द्र सिंह होरें आखेआ ऐ जे गृह मंत्रालय जम्मू कश्मीर थमां आतंकवाद गी पूरी चाल्ली खत्म करने लेई व्यापक नीति पर कम्म करा'रदा ऐ।
4. श्री अमरनाथ जी दी यात्रा दे दरान पैहले 15 दिनें च 3 लकख थमां बद्ध श्रद्धालुएं पवित्र गुफा च मत्था टेकेआ ऐ। जम्मू थमां 4 जहार 889 श्रद्धालुएं दा इक होर जत्था घाटी लेई रवाना।

<><><><><><>

PM-Job Creation

प्रधानमंत्री नरेन्द्र मोदी होरें आखेआ ऐ जे पिछले त्रऊं-चऊं बरें च 8 करोड़ नमें रोजगार पैदा कीते गे न जेहदे नै बेरोजगारी दे बारे च झूठा प्रचार करने आलें दी बोलती बंद होई गई ऐ। कल मुंबई च भारतीय रिजर्व बैंक दी इक रिपोर्ट दा हवाला दिंदे होई उनें आखेआ जे देश च हुनर विकास ते रोजगार दी लोड़ ऐ ते केन्द्र सरकार इस भेठा मता कम्म करा करदी ऐ। मोदी होरें आखेआ जे दुष्प्रचार करने आलियां ताकतां बुनियादी ढांचे दे विकास, भारत च रासपूजी आनने ते देसै दे आर्थिक विकास दियां दुश्मन न। कार्यक्रम च मोदी होरें सड़क, रेलवे ते समुंद्रै राए विकास सरबंधी 29 जहार करोड़ रपे दिएं परियोजनाएं दी बुनियाद रखी। उनें आखेआ जे एनडीए सरकार मुल्लखै च स्थिरता ते आर्थिक विकास गी तरजीह देआ करदी ऐ ते एहदे त्रीए कार्जकाल दा उनें सब्बने निवेशकें सुआगत कीता ऐ, जेहड़े भारत च रासपूजी लाना चांहदे न। मोदी होरें आखेआ जे महाराष्ट्र दा इतिहास बड़ा गौरवपूर्ण ऐ ते इस प्रदेश च खुशहाल भविक्ख दी बड़ी मती संभावना ऐ ते इसी दुनिया दी आर्थिक राजधानी बनाने लेई कम्म करना ऐ। उनें दस्सेआ जे मुंबई ते एहदे आले दोआले दे इलाकें च शुरू कीती जा'रदी बुनियादी ढांचा परियोजनाएं कन्ने आओजाई दी सुविधा बेहतर होग ते महिलाएं दी सुरक्षा बी बधोग। उनें दस्सेआ जे केन्द्र सरकार नै पालघर च दहानू थाहर, बधावन बंदरगाह दी मंजूरी देई दित्ती ऐ। एहदे नै 10 लकख लोकें गी कम्म रोजगार हासल होग। इस परियोजना पर 76 जहार करोड़ रपे दी लागत औने दा अंदाजा ऐ।

<><><><><><>

PM-Media

प्रधानमंत्री नरेन्द्र मोदी होरें आखेआ ऐ जे मीडिया गी लोड़चदा ऐ जे ओह सरकार दिएं लोक कल्याणकारी पैहलुएं गी बढ़ावा देने च सैहयोग करै। पर्यावरण संरक्षण पैहल "एक पेड़ मां के नाम" दे मिसाल दिंदे होई उनें आखेआ जे इस नूठी पैहल गी दुनिया भर च सराहना कीती गई ते मीडिया इसी जन आंदोलन बनाने च सैहयोगी होई सकदा ऐ। श्री मोदी होरें आखेआ विकसित भारत बनाने तांई अगले 25 बरें दी यात्रा च अखबारें ते रसालें दी भूमका महत्वै आली होग। श्री मोदी होर कल मुंबई च इंडियन न्यूज़ पेपर सोसायटी टावर्स दा उद्घाटन करने मगरा इक किट्टै गी संबोधत करा'रदे हे।

<><><><><><>

Centre Notification-LG

केन्द्र सरकार जम्मू कश्मीर दे उपराज्यपाल गी होर भत्ते अख्तियार दित्ते न। एह्दे लेई जम्मू कश्मीर पुर्नगठन अधिनियम, 2019 च तरमीम कीती गई ऐ। एह्दे कन्नै अखिल भारतीय सेवा दे अफसरें ते पुलस कर्मिं दे तबादले ते न्यांह पालिका कन्नै जुडे दे अधिकारिं दी तैनाती दे मामलें च उपराज्यपाल हुंदे इख्तियार बधी गे न। तरमीम कीते गेदे नियमें मताबक, हुन पुलस, सार्वजनिक बवस्था अखिल भारतीय सेवा ते भ्रष्टाचार विरोधी ब्यूरो कन्नै सरबंधत प्रस्ताह हुन सिद्दे गै मुख् सचिव हुंदे राएं उपराज्यपाल होरें गी भेजे जांगन। अज्जै तगर इनें प्रस्तावें ताई राज्य दे सचिव मैहकमें दी सिफारश दी लोड पौंदी ही।

<><><><><><>

LG-Powers

जम्मू कश्मीर सरकार नै आखेआ ऐ जे कल केन्द्री गृह मंत्रालय आस्सेआ, कम्म करने दे नियमें प्रक्रियाएं बारे जारी अधिसूचना दा मकसद प्रशासन दे कम्म करने दे तौर तरीके ते प्रक्रियाएं दे बारे च इक साफ तस्वीर पेश करना ऐ तां जे केन्द्र शासत प्रदेश च प्रशासन दा कम्म पूरी चाल्ली बवस्था आले ढंगै सिर चलाया जाई सकै जेह्दे च कुसै गी कोई शक शुबा जां भलेखा नेई रवै। सरकार दी सफाई देने दी एह प्रतिक्रिया कल इस विषये गी लेइयै किश सियासी पाट्रिं आस्सेआ सुआल पुट्टे जाने दी पछोकडै च आई ऐ। इस बारे आवा'रदिं बक्ख-बक्ख खबरें च अधिकारिक सूत्रें दे हवाले कन्ने आखेआ गेदा ऐ जे कल जारी अधिसूचना जम्मू कश्मीर पुर्नगठन कनून 2019 च दित्ते गेदे इख्तियारें दे तवाजन गी कुसै बी चाल्ली बदलाव नेई करदी। एह्दे च अग्गे आखेआ गेदा ऐ जे जम्मू कश्मीर पुर्नगठन कनून 2019 दी सेक्शन 32 मूजब विधान सभा राज्य सूचि च दर्ज कुसै बी मामले दे सरबंधै च कनून बनाई सकदी ऐ। पुलस, सार्वजनिक बवस्था जां भारतीय संविधान दी 7मीं सूचि दे अधिनियम दी दफा 53 मूजब उपराज्यपाल विधानसभा गी दित्ती गेदिं शक्तिं दे दायरे थमां औने आले कुसै बी मामले च अपनी समझ कन्नै कम्म करगंन जेह्डे अखिल भारतीय सेवाएं ते भ्रष्टाचार रोधी ब्यूरो कन्नै सरबंधी होर कोई मामला जेह्दे लेई उनेंगी कुसै कनून तैहत अपनी समझ कन्नै कम्म करने दी लोड होए।

<><><><><><>

CS-Tourism

मुख् सचिव अटल डुल्लू होरें सैलानी थाहरें पर गैर कनूनी निर्माण कम्म करने आलें लेई इक नोटिस जारी कीता ऐ ते इनें नियमें गी सख्ती कन्नै लागू करने पर जोर भरेआ ऐ। सैलसफा मैहकमे दे अधिकारिं कन्नै लग्गी दी इक बैठक दी अध्यक्षता करदे होई मुख् सचिव होरें मतैहत खेत्तरें च औने आली जमीनें दी नशान देइ करने दे निर्देश दित्ते न तां जे सैलानी थाहरें पर नियमें दी खलाफवर्जी बिलकुल बी नेई होए। मुख् सचिव होरें निर्देश दित्ते न जे सैलानिं दी सुविधाएं मताबक इनें इलाकें दी साफ सफाई लेई जरूरी बुनियादी ढांचे दा निर्माण कीता जा। उनें सैलानी थाहरें पर कचरे दे प्रबंधन करने दे कन्नै कन्नै गंदे पानी दी निकासी बारे बी गल्लबात कीती। सैलसफा मैहकमे दी कमीशनर सैक्रेटरी दशा मुदगल होरें आखेआ ऐ जे सैलसफा मैहकमे दिं संपत्तियें दी प्रक्रिया च होआ'रदे गैर कनूनी कम्म गी रोकने लेई पूरा-पूरा ध्यान दित्ता जाग।

<><><><><><>

Donald-Trump

अमरीका दे साबका राष्ट्रपति डोनाल्ड ट्रंप कल रातीं पेन्सिलवेनिया च इक चुनां सभा दरान गोली चलने दी घटना च घायल होई गे न। इस सिलसिले च सुरक्षाकर्मिं तुरत कारवाई करदे होई इक बंदूकदारी गी मारी मकाया। इस घटना च इक होर आदमी दी बी मौत होई गई ऐ ते इक होर दे घायल होने दी बी खबर ऐ इस घटना च डोनाल्ड ट्रंप मंच पर हेठ डिग्री पे। खूफिया सेवाएं दे अधिकारिं उनेंगी चुक्कियै तुरत उत्थुआं बाहर

लेईं गे। उंदे चेहरे पर खून दे नशान दिक्खे गे। ट्रंप होरें मगरा इक ब्यान जारी करियै जानकारी दिक्खी जे ओह ठीक न ते गोली उंदे सज्जे कन्नै दे उपरले हिस्से गी चीरदे होई निकली ते उंदा बचाह होई गेआ। उनें खुफिया सेवाएं ते होर सुरक्षा अधिकारिएं दी तुरत कारवाई दी सराहना कीती। राष्ट्रपति जो बाइडेन होरें इस घटना दी निदेया कीती ते डोनाल्ड ट्रंप होरें गी सुरक्षत बचाइयै बाहर लेईं जाने लेईं सुरक्षा अधिकारिएं दी सराहना कीती।

<><><><><><>

Jatinder Singh(byte)

जम्मू खित्ते च होआरदे लगातार आतंकवादी हमलें गी दिक्खदे होई प्रधानमंत्री हुंदे दफतरै च राज्य मंत्री डॉ. जितेन्द्र सिंह होरें आखेआ जे गृह मंत्रालय खित्ते थमां आतंकवाद गी खत्म करने लेईं इक व्यापक नीति पर कम्म करा'रदा ऐ। कठुआ थमां आकाशवाणी संवाददाता प्रदीप शर्मा नै जानकारी दिक्खी ऐ जे एह गल्ल मंत्री होरें कठुआ च इक लोक दरबार गी संबोधत करदे होई आक्खी। उनें आखेआ ऐ जे सेना गी जम्मू खित्ते दे पहाड़ी इलाकें च तैनात कीता गेआ ऐ तां जे मकामी लोकें च बसाह-भरोसा पैदा होइ सकै ते आतंकवादिएं पर दबाह बनी सकै। मंत्री होरें लोकें गी आखेआ जे ओह राष्ट्र बरोधी तत्वे खलाफ लड़ाई च अगगे आइयै सैहयोग करनं उनें आखेआ.....बाईट

<><><><><><>

Amarnathy Yatra

इस ब'रे दी श्री अमरनाथ जी दी यात्रा दे पैहूले 15 दिनें तकरीबन 3 लक्ख श्रद्धालुएं दक्खनी कश्मीर च बाबा बर्फानी दे पवित्र गुफा च मत्था टेकेआ ऐ। कल 14 ज्हार 255 श्रद्धालुएं गुफा च बर्फू कन्नै बने दे शिलिंग दे दर्शन कीते। जेहूदे कन्नै अजे तगर शिवें दे हिमलिंगम रूपे दे दर्शन करने आले श्रद्धालुएं दी गिनतरी 3 लक्ख दे आंकड़े तगर पुज्जी गेई ऐ। ताई अज्ज जम्मू दे भगवती नगर आले आधार शिविर थमां 4 ज्हार 889 श्रद्धालुएं दा जत्था घाटी लेईं रवाना होआ। एह श्रद्धालु अज्ज बडले 147 गड्डिडएं दे काफले च सुआर होइयै निकले न, उंदे व 3 ज्हार 672 मर्द, 1 ज्हार 86 महिलां, 21 बच्चे, 88 साधु ते 22 साध्वियां शामिल न। कुल 4 ज्हार 889 श्रद्धालुएं चा 1 ज्हार 896 श्रद्धालु बालटाल लेईं ते 2 ज्हार 994 श्रद्धालु पहलगाम लेईं रवाना होए।

<><><><><><>

Yatra Award

श्रम आयुक्त चरणदीप सिंह होरें गी पिछले ब'रे आली श्री अमरनाथ जी दी यात्रा च बेहतररीन ते टकोहदी कारकरदगी दस्सने लेईं SKOCH सम्मान हासल होआ ऐ। एह सम्मान श्री अमरनाथ जी दी यात्रा गी कचरा मुक्त बनाने लेईं कीते गेदे जतनें आस्तै हासल होआ ऐ। इस सरबंधे च सम्मान समारोह नमीं दिल्ली च होआ। ग्रामीण विकास ते पंचैती राज मैहकमा जम्मू कश्मीर नै श्री अमरनाथ अस्थापन बोर्ड दे सैहयोग कन्नै यात्रा गी पर्यावरण अनुकूल ते टिकाऊ ते श्रद्धालुएं मुआफिक बनाया ऐ।

<><><><><><>

Youth

अखनूर इलाके दे जोड़ियां थमां इक नोजवान इक म्हीने थमां लापता हा, पाकिस्तान दे प्रशासन नै ओहूदी मौत दी पुष्टि कीती ऐ। सूत्रें मताबक हर्ष नगोत्रा, सुभाष शर्मा दा जागत हा जेहड़ा चनांह दरेया दे कश बकोर इलाके थमां 11 जनू गी लापता होई गेआ हा। लापता नोजवान दे परोआर आले ओहूदे लापता होने दी शकैत पुलस थाने च करोआई जेहूदे मगरा ओहूदा मोटर सैकल दरेया दे कोला बरामद होआ। हुन पाकिस्तान दे अधिकारी नै हर्ष नगोत्रा दी मौत दी पुष्टि कीती ऐ। परोआर नै हुन प्रशासन थमां नगोत्रा दा पार्थिव शरीर गी

वापस आहने दी गुजारश कीती ऐ। एह जानकारी मरने आले नोजवान दे पिता दे हवाले कन्ने इक अखबार च दित्ती गई।

<><><><><><>

India-Zimbabwe

क्रिकेट टी-20 मैचें दी श्रृंखला दा 5मां ते खीरला मैच अज्ज भारत ते जिम्बावे बश्कार हरारे स्पोर्टस क्लब च खेड्डेआ जाग। दपैहरी मगरा साढे 4 बजे शुरू होग। भारत पैहले गै 3-1 कन्ने अगगे चला'रदी ऐ। एहदे थमां पैहले कल खेड्डे गेदे इस श्रृंखला दे चौथे मैच च भारत नै जिम्बावे गी 10एं विकटें कन्ने हराई दित्ता। जित्त आस्तै 153 रंजें दा पिच्छा करदे होई भारत नै 16में ओवर च बिजन कोई विकअ गवाए दे एह लक्ष्य हासल करी लैता। यशस्वी जयसवाल नै शानदार 93 रंज बनाए ते उनेंगी मैच दा सर्वक्षेष्ठ खडारी पुरस्कार मैन ऑफ दा मैच घोषत कीता गेआ।

<><><><><><>